

Ursina Haller nova commembra en il cussegl dal public SRG.R


■ (rtr) Il Cussegl dal public SRG.R è sa fatschentà en sia ultima seduta cun la purschida per ils giuvenils tar RTR Radiotelevisiun Svizra Rumantscha. Pli navant ha Ladina Heimgartner, directura RTR, referì davart l'impurtanza da la SRG ssR per la Svizra Rumantscha. Il cussegl dal public SRG.R lauda l'emissiun da la damaun «revista da medias/meteo». L'emissiun è di per di a las 6.50 ed a las 7.50. RTR è capabla d'infurmar da moda cumpacta ed instructiva sur dals cuntengns ils pli impurtants da las gassetas dals di.

battaporta.rtr.ch

Il cussegl dal public ha prendì sut la marella las contribuziuns da video, che vegnan realisadas da la redacziun giuvenila da battaporta.rtr.ch. Intginas purschidas – sco per exempel «ina chanzun – mia istorgia» – persvadan. L'impurtanza da l'offerta per in public giuven è nuncontestabla. La pagina existenta www.battaporta.ch na correspunda betg a las pretaisas dad ozendi, quai è l'opiniun dal cussegl dal public. Ina repassada ed integraziun en la pagina d'internet www.rtr.ch è prevesida per l'onn proxim. La redacziun da battaporta furnescha er ad auters chanals da social media cuntengns. Schebain ch'ils cuntengns vegnan clamads si savens, è l'interacziun cun il public modesta. La funcziun da commentaris na vegn quasi mai utilisada.

RTR ferm grazia a la societad purtadra

En tge connex stattan RTR, la societad e la lescha? Danunder vegn l'idea dal service public audiovisual? E quant gronda è la differenza da la structura SRG da quellas d'autras chasas da medias publicas sin tut il mund? Quella ed autras dumondas sumegliantas ha la directura RTR, *Ladina Heimgartner*, explitgà en in curt referat. Ella ha suttastritgà l'impur-



Ursina Haller.

MAD

tanza da la societad purtadra per l'interpresa, sia independenza e sia francada tar il pievel da la Svizra Rumantscha.

Eleccziuns

A *Martina Schudel-Noggler* vegn a succeder *Ursina Haller*, anteriura snowboardista da freestyl. Ella è da Tavau e Muri ed abitescha a Zernez e Turitg. Ursina Haller studegia politologia, dretg public e dretg internaziunal a l'universitad da Turitg. Cun l'elecziun dad Ursina Haller è era l'aspect da la diaspora resguardà.

Prospectiva

En la proxima sesida il favrer 2015 s'occupa il CP SRG.R cun la nova cumparsa dal studio da televisiun da RTR. Il studio a Cuira vegn renovà ed il decor surlavurà. La directura RTR vegn a preschentar la strategia da RTR. Ina cumissiun dal cussegl dal public prepara actualmain la segunda ediziun dal premi schurnalistic SRG.R. Il premi vegn surdà ils 8 d'avrigl 2015.